

STATUTO DELLA COMUNITÀ DEL COLLIO
STATÛT DE COMUNITÂT DAL COLLIO
STATUT SKUPNOSTI COLLIO

CJAPITUL I
PRINCIPIS FONDAMENTÂI

Art. 1

(Istituzion, ogjet e sede)

1. Daûr de leç regionâl ai 29 di Novembar dal 2019, n. 21, in date 01.01.2023 si constituiss, la Comunitât dal Collio che e cjape dentri i Comuns di Cormons, Caprive, San Florean dal Collio/Občina Števerjan, Dolegne dal Collio, Migjee, Mosse, Fare, Morâr, San Luring Lisuntin, Marian. L'ambit teritoriâl de Comunitât al coincît cun chel dai Comuns che le costituissin.
2. La Comunitât e je un ent locâl pal exercizi associât di funzions e servizis comunai e sorecomunai. A chest si aplichin i principis e, stant che a son compatibilis, lis normis previodudis pai Comuns.
3. Chest Statût al fisse lis normis fundamentâls di organizazion e funzionament de Comunitât dal Collio.
4. La Comunitât e à sede legâl intal teritori dal Comun di Cormons. I siei orghins a puedin dâsi dongje ancje intune sede diverse, al baste che e sedi cjapade dentri intal ambit teritoriâl de Comunitât.
5. La Comunitât e à tant che segn distintîf il propri steme, che il so ûs al è fissât cuntun regolament.
6. La descrizion dal Steme e je cheste: fonts zâl cun parsore n. 11 liniis di colôr blanc a man çampe, n. 11 liniis di colôr blanc a man drete cun tal mieç trê liniis di colôr blanc cun scrit sore **COMUNITA' DEL COLLIO - COMUNITÂT DAL COLLIO – SKUPNOST COLLIO**.

Art. 2

(Finalitâts)

1. La Comunitât, intal ricognossi e rispjetâ il rûl dai orghins istituzionai dai Comuns partecipants tant che titulârs de rapresentance democratiche dai citadins, e cîr di otignî chescj obietîfs:
 - a) valorizazion, conservazion e disvilup teritoriâl, economic, sociâl, turistic, ambientâl e culturâl di dut l'ambit teritoriâl di riferiment e des comunitâts locâls che le costituissin;
 - b) integrazion dai teritoris dai Comuns partecipants, intal rispjet des specificitâts singulis;
 - c) miorament de cualitât dai nivei essenziâi des prestazions e dai servizis furnîts ai citadins;
 - d) otimizazion dai nivei di justece, partecipazion, semplificazion, funzionalitât, economicitât, eficacie e eficiencia de azion amministrative;
 - e) razionalizazion e contigniment de spese;
 - f) tutele des minorancis linguistichis, valorizazion des specifichis identitâts storichis,

culturâls, e ancje des tradizions e dai ûs des popolazions residentis;
g) valorizazion de partecipazion des popolazions locâls ae ativitât aministrative.

Art. 3

(Funzions e servizis esercitâts de Comunitât)

1. La Comunitât e pues organizâ e gjestî chestis funzions e chescj servizis comunâi:

- a) centralizazion uniche de comitence;
- b) elaborazion, presentazion e gjestion di progjets a finanziament european;
- c) programazion e planificazion teritoriâl di nivel sorecomunâl;
- d) gjestion dal personâl e coordinament de organizazion gjenerâl de aministrazion e de ativitât di control;
- e) polizie locâl e polizie aministrative locâl;
- f) gjestion dai sistemis informatîfs e tecnologjiiis de informazion e de comunicazion;
- g) ativitâts produtivis, cjapât drenti il sportel unic;
- h) servizis finanziariis e contabilis e control di gjestion;
- i) gjestion dai servizis tributaris;
- l) planificazion di protezion civîl;
- m) oparis publichis e proceduris di espropriazion;
- n) edilizie private;
- o) statistiche;
- p) catastic, gjavant lis funzions mantignudis dal Stât su la fonde de normative in vore;
- q) programazion e planificazion teritoriâl di nivel comunâl;
- r) proceduris di autorizazion in materie di energjie;
- s) proceduris in materie di ambient;
- t) organizazion di servizis publics locâi;
- u) politicis pai zovins;
- v) contrast dai fenomens discriminatoris e promozion de paritât om e femine sul teritori;
- z) altris funzions e servizis demandâts e conferîts dai Comuns.

2. Il conferiment des funzions al pues jessi fat par ducj i Comuns o dome par cualchidun di lôr. Il conferiment dal esercizi di funzions e servizis comunâi ae Comunitât al è fat bon cun deliberazions conformis dai Conseis dai Comuns interessâts e de Assemblee de Comunitât a maiorance dai vôts favorevui e al è acompagnât, pene la ineficacitât, dal trasferiment des relativis risorsis umanis e/o finanziariis e/o strumentâls de bande dai Comuns interessâts dits parsore.

3. Cu lis deliberazions dal come 2, i Comuns costituîts in Comunitât a definissin la cuote anuâl des propriis jentradis di viersâ ae Comunitât pal esercizi des funzions che il singul Comun al à conferîr.

4. Lis modalitâts, lis cundizions di esercizi des funzions e i criteris pe cuantificazion dai contribûts finanziariis respetîfs a son disciplinâts cuntun regolament.

5. In plui che cu lis modalitâts dal come 2, la Comunitât e pues esercitâ funzions e

servizis delegâts dai Comuns, ancje se no 'nt fasin part, cu la stipule des convenzions dal articul 5 de leç regionâl 21/2019, fatis buinis de Assemblee de Comunitât e dal consei di ogni Comun interessât.

Art.4

(Norme transitorie pal trasferiment des funzions comunâls ae Comunitât)

1. La Comunitât e cjaparà inviament cu lis funzions dal art.3 come 1 letaris "d", "e", "f", "g", "i", "l" daûr des modalitâts previodudis tal art.3 come 2 di chest Statût.
2. Cun deliberazions sucessivis e cu lis decorencis indicadis culi, i Comuns aderents ae Comunitât stesse a podaran ancje conferî chês altris funzions e servizis comunai previodûts dal Statût, daûr des modalitâts previodudis dal art.3 come 2 di chest Statût.
3. Intai intarts dal conferiment dal esercizi des altris funzions ae Comunitât a pet di chês indicadis tal come 1, la Comunitât e pues esercitâ funzions e servizis delegâts dai Comuns, ancje di chei che no partecipin ae stesse, cu la stipule des convenzions dal articul 5 de leç regionâl 21/2019, tant che previodût dal art. 3, come 5 di chest Statût.

Art.5

(Regolaments)

1. I regolaments de Comunitât a disciplinin la organizazion e lis modalitâts di esercizi des funzions e dai servizis di sô competence.
2. I regolaments de Comunitât a son fats bogns de Assemblee a maiorange dai vòts favorevui sui contraris gjavant chel sul ordenament dai uficis e dai servizis, di competence dal Comitât esecutîf fat bon a maiorange assolude dai vòts assegnâts.
3. I schemis di regolament di someti ae aprovazion de Assemblee a son adotâts dal Comitât esecutîf.

Art. 6

(Durade de Comunitât e adesion di gnûfs Comuns)

1. La Comunitât e je costituide a timp indeterminât, cun decorence dal 1ⁿ di Zenâr dal 2023.
2. La adesion ae Comunitât di un gnûf Comun e je fate buine, adun cu la modificazion di chest Statût, de Assemblee de Comunitât e dal consei comunâl interessât cu la procedure e lis maiorancis domandadis pes modificazions statutariis e e à efiet dal 1ⁿ di Zenâr dal an dopo di chel di aprovazion des relativis deliberazions.

Art. 7

(Recès de Comunitât e revoche di singulis funzions e servizis)

1. Ognidun dai Comuns nol pues recedi in maniere unilaterâl de Comunitât prime che a sedin passâts cinc agns de adesion ae stesse, fûr che tal câs di acuardis diviers. I rapuarts juridics e economics che a son tra la Comunitât e il Comun che al recêt a son regolâts di un acuardi fat bon cu la deliberazion di recès dal Comun che si fevele tal come sucessîf e fat bon de Assemblee de Comunitât. Chest acuardi al ven sotscriet dai rapresentants legai dai ents interessâts (Comun interessât e Comunitât) dentri di sessante dîs de adozion de

deliberazion consiliâr di recès. Tal câs di mancjade sotscrizion dal acuardi, il stes al è fat bon di un coleç arbitrâl costituît di un membri nomenât di ognidune des parts e di un tierç component sielt in acuardi tra lis parts.

2. La deliberazion di recès, che e ripuarte i impegnis che si cjatin intai comis seguitîfs, e je adotade dal consei comunâl dentri dal mêsi di Març cu lis maiorancis domandadis pes modificazions statutariis dai Comuns e e à efiet dal 1ⁿ di Zenâr dal an dopo di chel di trasmission ae Comunitât, fûr che tal câs di acuardis diviers.

3. In câs di recès, il Comun che al recêt al jentre intal exercizi des funzions e dai servizis conferîts ae Comunitât; al è duncje obleât a puartâ a conclusion ducj i procediments in cors, e ancje ae assunzion di ducj i rapuarts juridics atîfs e passîfs e dai eventuâi contenziôs vignûts fûr che a tocjin il Comun.

4. In câs di recès il personâl comandât, distacât o trasferît ae Comunitât de bande dal Comun che al recêt, al torne inte dotazion organiche dal Comun stes daûr dai timps fissâts intal acuardi dal come (1). La Comunitât e pues domandâ il mantigniment intal so organic dal personâl interessât, determinant la gnove ripartizion des cuotis finanziariis dovudis pal stes fra i Comuns aderents.

5. Tal câs che la procedure di recès e sedi ativade di plui di un Comun, ancje in moments diviers, la Comunitât e domande la ricolocazion intai Comuns che a recedin dal personâl che e à assumût in maniere direte par davuelzi lis funzions e i servizis comunâi, in proporzion a dut il personâl assumût e aes cuotis di partecipazion dai ents che a revochin. I Comuns stes a varan di garantî cheste ricolocazion.

6. Fale che l'acuardi di recès dal come (1) al disponi in altre maniere, il Comun:

a) si impegne viers de Comunitât a adempî aes obligazions e ai impegnis cjapâts prime dal recès cu lis relativis cjamis par dute la durade dai stes;

b) al continue a sostignî *pro quota* lis cjamis peadis aes obligazions che a àn di jessi sodisfatis de Comunitât pal davuelziment di funzions, servizis e ativitâts che il Comun a cualsisedi titul i à dât, dulinvie dal afidament/rapuart juridic che al è tra la Comunitât e, pai trê agns seguitîfs, pal personâl che cheste e à assumût in maniere direte;

c) si impegne a regolâ ducj i rapuarts finanziariis passîfs viers de Comunitât dentri de date di decorence dai efiet dal recès.

7. Par consequence dal recès i bens a son ripartîts daûr di ce che al è fissât intal acuardi tra lis parts siglât daûr dal come (1).

8. I principis e i criteris dai comis 1, 5 e 6 si aplicjin ancje in câs di revoche di une funzion o di un servizi conferîts ae Comunitât daûr dal articul (3, come 1), o di recès de convenzion pal exercizi di funzions comunâls de bande de Comunitât daûr dal articul (3, come 5).

9. Chest Statût, i regolaments e chei altris ats deliberatîfs che a vedin di jessi incompatibii cu la gnove dimension dal ent a son modificâts da orghins competents de Comunitât.

Art. 8

(Disfasiment de Comunitât)

1. Il disfasiment de Comunitât al è disponût cun deliberazions conformis de Assemblee e di ducj i conseis dai Comuns partecipants adotadis cu la procedure e lis maiorancis domandadis pes modificazions statutariis. In câs di recès di ducj i Comuns fale un il disfasiment al opere di dirit. I rapuarts juridics e economics a son definîts di un acuardi di

pueste.

2. Pes finalitâts dal come 1, l'orghin di vertiç de Comunitât al predispon un plan di licuidazion cun evidence dai rapuarts atîfs e passîfs, dai bens e des risorsis strumentâls acuisîts de Comunitât pal exercizi des funziions e dai servizis e des eventuâls licuidaziions finanziariis di compensazion tra i Comuns interessâts. Il plan al è trasmetût ai ents interessâts e fat bon cun deliberaziions conformis de Assemblee e dai Conseis comunâi.

3. In câs di disfasiment, i Comuns che a fasin part de Comunitât a restin obleâts viers dai ents o sogjets che a sucedin intai rapuarts de Comunitât, dome par chescj rapuarts, pes obligaziions viers de Comunitât che no son stadis ancjemò puartadis insom tal moment dal disfasiment. A son lassâts fûr i acuardis tra i Comuns e i ents che a subentrin ae Comunitât, indreçâts a regolâ intune altre maniere i lôr rapuarts dopo dal disfasiment.

4. In câs di disfasiment de Comunitât, il personâl in servizis, e ancje il personâl assumût in maniere direte de Comunitât, al varà di jessi ricolocât in maniere obligatorie intai Comuns aderents ae Comunitât. La individuazion concrete des risorsis umanis di trasferî e vignarà fate midiant acuardi tra lis parts.

Art. 9

(Formis di partecipazion e control dai Comuns)

1. Cun riferiment aes funziions comunâls conferidis a son istituidis chestis formis di partecipazion e control dai aministradôrs dai Comuns partecipants ae Comunitât:

a) conferencis dai assessôrs comunâi e/o conseîrs delegâts par operâ il racuardi tra il Comitât esecutîf de Comunitât e lis zontis dai Comuns aderents; lis conferencis, clamadis par materie, dal President de Comunitât, a costituissin l'organisim propulsîf e consultîf pe gjestion des funziions e dai servizis conferîts ae Comunitât;

b) assemblee plenarie dai components dal Comitât esecutîf de Comunitât e di ducj i assessôrs dai Comuns partecipants; e je convocade dal President de Comunitât cun funzion informative e di confront partecipatîf.

CJAPITUL II

ORGHINS DI GUVIER

Art. 10 ***(Orghins di guvier)***

1. A son orghins di guvier de Comunitât:

- a) la Assemblee;
- b) il President;
- c) il Comitât esecutîf.

2. I orghins di guvier a esercitin lis funzions che la leç e chest Statût ur assegnin, intal rispîet dal principi de separazion tra i compits di direzion politiche e chei di direzion amministrative, e a impuestin la lôr ativitât sui principis di trasparenza e eficiencie.

Art. 11 ***(Composizion de Assemblee)***

1. La Assemblee de Comunitât si compon di ducj i Sindics dai Comuns partecipants ae Comunitât, tant che membrs di dirit; i components a decjadin tal câs che la lôr cjarie e vegni dismetude tal Comun, cun efiet a tacâ de date de cessazion.

2. La Assemblee e je convocade e sorintindude di un President elet fra i components de stesse; fin a cheste elezion, e dut câs tal câs di assence dal President elet, lis funzions di President de Assemblee a son davueltis dal Sindic dal Comun cul numar plui alt di abitants.

3. I Sindics dai Comuns a puedin, daûr des voltis, midiant di un at comunicât al President de Assemblee, delegâ un aminstradôr a rapresentâju intes sentadis de Assemblee. Tal câs di incompatibilitâts previodudis de normative in vore, la deleghe e pues jessi conferide ancje in maniere permanente.

4. Cul at de proclamazion, il Sindic elet al sostituîs par ducj i efiets inte Assemblee il Sindic dismetût.

Art. 12 ***(Vôts che i tocjin a ogni component de Assemblee, maiorancis e quorum)***

1. Ogni Sindic al esprim un vôt in Assemblee.

2. Tal câs che nol sedi previodût in altre maniere di chest Statût, lis deliberazions a son fatis buinis in maniere valide cun maiorance assolude dai vôts dai presints e cuant che e je presinte la metât plui un dai vôts complessîfs.

3. Gjavant lis deliberazions dal art. 3 come 2 di chest Statût, no si calcolin in ogni câs aprovadis lis deliberazions che a vedin il vôt contrari di almancul un tierç dai components assegnâts de Assemblee o ben di un numar di Comuns che a rapresentin plui di un tierç dai abitants de popolazion residente intal teritori de Comunitât. Par chest, pe definizion de popolazion residente si ten cont dal dât riferît al 31.12 dal an prime.

Art. 13

(Competencis de Assemblee)

1. La Assemblee e je espression dai Comuns che a costituissin la Comunitât e e je il so orghin di indreçament politic aministratîf.
2. La Assemblee e delibere, in particolâr, su chescj ats:
 - a) modificazions statutariis;
 - b) programs adotâts dal Comitât esecutîf;
 - c) documents contabii fundamentâi e ratifiche des variaziions di bilanç adotadis in maniere urgente dal Comitât esecutîf;
 - d) regolaments, infûr di chei assegnâts ae competence di altris orghins;
 - e) elezion e sfiducie dal President e dal Comitât esecutîf;
 - f) criteris pes nominis e pes designazions di rapresentants de Comunitât de bande dal Comitât esecutîf;
 - g) nomine dal orghin di revision intal rispiet di ce che al è previodût dal art. 24, comis 2, 4 e 5, l.r. 21/2019;
 - h) organizazion e concession di servizis publics, afidament di ativitâts o di servizis midiant convenzion;
 - i) dissipline gjenerâl des tarifis pe fruizion dai bens e dai servizis di competence de Comunitât;
 - l) acuiscj, alienazions e permutazions imobiliârs, costituzion e modificazion di dirits reâi sul patrimoni imobiliâr de Comunitât, apalts e concessions che no sedin previodûts di pueste in altris ats de Assemblee o che no costituissin une semplice esecuzion e che no jentrin inte aministrazion ordenarie di funziions e servizis di competence dal Comitât esecutîf o dai orghins burocratics;
 - m) contrazion di mutuis e viertiduris di credit no previodûts in maniere esplicite in altris ats de Assemblee.
3. Lis deliberazions dal come 2 no puedin jessi adotadis in vie di urgjence di altris orghins de Comunitât, infûr di chês che a tocjin lis variaziions di bilanç adotadis dal Comitât esecutîf di sometî a ratifiche de Assemblee intai tîmps fissâts de normative in vore, pene la decjadence.

Art. 14

(Funzionament de Assemblee)

1. Il funzionament de Assemblee al è disciplinât cuntun regolament aprovât a maiorance assolude dai components in conformitât cui principis fissâts di chest Statût.
2. Il regolament dal come (1) al discipline in particolâr:
 - a) lis modalitâts di convocazion de Assemblee;
 - b) lis modalitâts di presentazion e discussion des propuestis;
 - c) il numar dai components necessari pe validitât des sentadis;
 - d) il numar di vôts favorevui necessariis pe adozion des deliberazions.

3. La ativitât de Assemblee si davuelç te sede de Comunitât o, daûr des necessitâts, in altris sedis che si cjatin intal teritori dai Comuns partecipants.

Art.15

(President de Comunitât)

1. Il President de Comunitât al è il rapresentant legâl e judiziâl dal ent; al è elet de Assemblee a maiorance assolude dai components, fra i sindics dai Comuns partecipants.

2. Il President, in particolâr:

a) al propon ae Assemblee i nominatîfs dai components dal Comitât esecutîf;

b) al nomene il Vicepresident tra i components dal Comitât esecutîf;

c) al convoche e al è a cjâf dal Comitât esecutîf;

d) al nomene l'orghin aministratîf di vertiç;

e) al nomene i dirigjents e, in mancjance di chescj, i responsabii dai uficis e dai servizis, daûr di ce che al è previodût dal regolament sul ordenament dai uficis e dai servizis;

f) al sorintint al funzionament dai uficis e dai servizis;

g) al sorintint ae gjestion des funzions asociadis garantint un racuardi istituzionâl tra la Comunitât e i Comuns;

h) al da diretivis al Diretôr par ce che al tocje i indreçaments funzionâi e di vigjilance su dute la gjestion aministrative di ducj i servizis e i uficis;

i) al verifich la corispondence dai risultâts de gjestion aministrative cu lis diretivis gjenerâls dadis; al propon lis materiis di tratâ intes sentadis de Assemblee;

j) al à competence e podês di indreçament su la ativitât dai components dal Comitât esecutîf;

k) al davuelç lis funzions dal art.1, c.111 de L. 56/2014.

3. Il President al reste in cjarie trê agns, infûr di câs di decjadence, dimissions e aprovazion de mozion di sfiducie dal articulo 19. Al pues tornâ a jessi elet par altris trê agns.

4. Il President al decjât de cjarie intai câs previodûts de leç. Il President al decjât de cjarie tal câs di dimissions presentadis cu lis modalitâts dal articulo 18.

5. In câs di cessazion anticipade de cjarie par decjadence o dimissions dal President, lis funzions relativis a son esercitadis, fin ae gnove elezion, dal Vicepresident. Denti di trente dîs de cessazion de cjarie dal President, cun deliberazion cjapade a maiorance assolude dai components, la Assemblee e proviôt ae nomine dal so sucessôr, che il so mandât al finis intune cu la scjadince dal Comitât esecutîf in cjarie.

Art.16

(Vicepresident de Comunitât)

1. Il Vicepresident al è nomenât dal President de Comunitât tra i components dal Comitât esecutîf.

2. Il Vicepresident al sostituìs il President intal exercizi di dutis lis funzions tal câs di sô assence o impediment, e ancje in câs di decjadence dal ufici o di dimissions, pal timp necessari ae elezion dal gnûf President de bande de Assemblee.

Art. 17

(Comitât esecutîf)

1. Il Comitât esecutîf al è l'orghin esecutîf dal ent e al colabore cul President de Comunitât pal guvier de stesse.

2. Il Comitât esecutîf al è costituît dal President de Comunitât, che lu sorintint, e di cuatri components, eletts de Assemblee fra i Sindics dai comuns, intal rispiet di chescj criteris:

- a) 2 membrs individuâts tra i Comuns cun popolazion fin a mil abitants;
- b) 1 membri individuât tra i Comuns cun popolazion di passe mil abitants;
- c) 1 membri cun popolazion di passe 5 mil abitants.

Pal rispiet dai criteris dits sore e ven calcolade ancje la cjarie dal President de Comunitât.

La elezion ae cjarie di President dal Sindic dal Comun plui popolôs e dilibere il puest riservât a pro di un membri di un Comun di passe mil abitants.

3. Il Comitât esecutîf al cjape sù i ats idonis al otigniment dai obietîfs e dai fins dal ent, intal cuadri des direzions gjenerâls e in atuazion des decisions fundamentâls fatis buinis de Assemblee e, in particulâr:

- a) al cjape sù i programs di realizâ e ju mande ae Assemblee pe aprovazion;
- b) al predispon i schemis dai documents contabii fundamentâi di someti ae aprovazion de Assemblee;
- c) al cjape sù lis propuestis di modificazions statutariis e i schemis dai regolaments di someti ae aprovazion de Assemblee;
- d) al fâs bon il regolament sul ordenament dai uficis e dai servizis;
- e) al fisse i criteris pe atribuzion des incarghis dirigjenziâls e pe nomine dai responsabii dai uficis e dai servizis, di competence dal President;
- f) intai câs di urgjence, al cjape sù lis variaziions di bilanç necessariis di someti ae ratifiche de Assemblee dentri dai sessante dîs seguitîfs, pene la decjadence;
- g) al dispon i prelevaments dal fonts di riserve;
- h) al nomine, al designe e al revoche i rapresentants de Comunitât intai ents e intes associazions, tal rispiet dai criteris fissâts de Assemblee;
- i) al riferis, in sede di aprovazion dal rindicont, ae Assemblee su la sô ativitât.

4. Il Comitât esecutîf al davuelç ogni altre funzion no atribuide ae Assemblee e al President.

5. Il Comitât esecutîf al reste in cjarie trê agns, infûr di câs di decjadence, dimissions e aprovazion di une mozion di sfiducie dal articul 19.

6. In câs di decjadence de cjarie di component dal Comitât esecutîf par pierdite dai requisîts di leç, e ancje in câs di cessazion anticipade par dimissions o altre cause, la Assemblee e proviôt dentri di trente dîs ae sostituzion dal component decjadût, dimissionari o dut câs dismetût, cun deliberazion cjapade a maiorance assolude dai components. Il mandât dal component neoelet al finis intune cu la scjadince dal Comitât esecutîf in cjarie.

7. Intal câs là che e mancji la maiorance dai components dal Comitât esecutîf, l'orghin al decjât e la Assemblee e torne a fâ la elezion dentri di trente dîs de ultime vacance; il mandât dal orghin neoelet al finis intune cu la scjadince dal President in cjarie.

8. Ai components dal Comitât esecutîf a puedin jessi delegâts ambits specifics di ativitât.

Art. 18

(Dimissions dal President de Comunitât e dai components dal Comitât esecutîf)

1. Lis dimissions de cjarie di President de Comunitât e di component dal Comitât esecutîf a son indreçadis in forme scrite ae Assemblee de Comunitât e cjapadis sù daurman tal protocol dal ent, intal ordin temporâl di presentazion; no si puedin revocâ, nol covente cjapânt at e a son validis daurman.

Art. 19

(Mozion di sfiducie)

1. Il President de Comunitât e il Comitât esecutîf si dimetin de cjarie tal câs di aprovazion di une mozion di sfiducie esprimude midiant apel nominâl cun vôt de maiorange assolude dai components de Assemblee.

2. La mozion e à di jessi motivade, sotscribe di almancul doi cuints dai components de Assemblee, staronzâts par ecès.

3. La mozion e ven metude in discussion no prime di dîs dîs e no passe trente dîs de sô presentazion.

4. La Assemblee e procêt ae elezion dai gnûfs orghins dentri di trente dîs de aprovazion de mozion di sfiducie dal come 1.

Art. 20

(Funzionament dal Comitât esecutîf)

1. La ativitât dal Comitât esecutîf si davuelç te sede de Comunitât o, daûr des necessitâts, in altris sedis che si cjatin intal teritori dai Comuns partecipants.

2. Il Comitât esecutîf al è convocât e al à a cjâf il President, che a 'nt coordene la ativitât. Si da dongje ogni volte che al covente.

3. Il Comitât esecutîf al è constituît in maniere valide cu la presince de maiorange dai siei components e lis sôs deliberazions a son fatis buinis a maiorange assolude dai presints. I components dal Comitât esecutîf a votin par apel nominâl o par alçade di man, a discrezion dal President. In câs di paritât di vôts al prevâl chel dal President.

4. Il President de Comunitât al pues delegâ ai singui components dal Comitât esecutîf ambits specifics di ativitât.

5. Aes sentadis dal Comitât esecutîf a puedin partecipâ, se invidâts e cence dirit di vôt, tecnics esperts e funzionaris o altris sogjets.

CJAPITUL III ORGANIZAZION

Art. 21

(Principis structurâi e organizatîfs)

1. La strutture organizative de Comunitât e je impuestade su criteris di autonomie operative e di economicitât de gjestion, intal rispiet dai principis di professionalitât e di responsabilitât pal otigniment dai obietîfs programatics fissâts dai orghins di guvier.
2. I orghins di guvier de Comunitât a individuin i obietîfs prioritâris dal ent e a definissin i procès di control in stât di misurâ il nivel di trop che si è rivâts a otignî.
3. La gjestion si davuelç midiant dal otigniment dai obietîfs dal come (2) e e à di jessi impuestade su chescj principis:
 - a) semplificazion des proceduris, transparence e prevenzion de coruzion;
 - b) organizazion dal lavôr par progjets, obietîfs e programs realizabii e compatibii cu lis risorsis umanis e finanziariis a disposizion;
 - c) analisi e individuazion des produtivitâts e des cjamis funzionâls di lavôr e dal grât di eficacie de ativitât davuelte di ogni element dal aparât;
 - d) individuazion di responsabilitâts colegadis a strent al ambit di autonomie decisionâl dai sogjets;
 - e) superament de separazion rigjide des competencis inte division dal lavôr e otigniment de flessibilitât massime des structuris e dal personâl e de colaborazion massime tra i uficis.
4. La azion amministrative e ponte al avanzament costant dai risultâts riferîts ae cualitât dai servizis e des prestazions, ae sveltece e ae semplificazion dai interventis, al contigniment dai coscj, ae estension dal ambit di fruizion des utilitâts sociâls prodotis a pro de popolazion de Comunitât.

Art. 22

(Principis in materie di ordenament dai uficis e dai servizis)

1. La Comunitât e proviôt ae determinazion de sô strutture organizative. In particolâr, e proviôt ae organizazion e ae gjestion dal personâl intal ambit de proprie potestât normative e autonomie organizative e finanziarie intal rispiet dai limits che a derivin des propriis capacitâts di bilanç, des esigjencis di esercizi des funzions e dai compits che i vegnin assegnâts e dai principis fundamentâi che a regolin i rapuarts di lavôr aes dependencis des amministrazions publichis.
2. Il dissen organizatîf de Comunitât si inspire a criteris di autonomie, funzionalitât, economicitât di gjestion, in mût di garantî il confront cui singui teritoris e cu lis zonis plui periferichis, ançe cu la istituzion di un o plui sedis operativis, contignint lis criticitâts conetudis al acentrâment e ae standardizazion dai servizis.
3. Il personâl de Comunitât al è organizât su la fonde dai principis di responsabilitât, flessibilitât, valorizazion dal apuart individuâl, cualificazion professionâl.
4. Il regolament pal ordenament dai uficis e dai servizis, articolâts in structuris operativis, al definîs lis regulis e lis carateristichis dal sisteme di decision e direzion dal ent, specificant lis finalitâts e lis carateristichis essenziâls dai rûi di direzion e determinant lis responsabilitâts

assegnadis ai responsabii di servizi, e ancje i altris aspjets che a tocjin la organizazion e il funzionament dai uficis.

Art. 23

(Personâl)

1. Il personâl de Comunitât al è costituît dal personâl dipendent assumût e di chel trasferît, comandât o metût a disposizion dai Comuns de Comunitât, cu lis modalitâts fissadis dal regolament pal ordenament dai uficis e dai servizi.
2. La Comunitât e pues zovâsi dal personâl e des structuris operativis dai Comuns participants dopo vê fat un acuardi cui Comuns stes.
3. La Assemblee de Comunitât, par che e puedi procedi ae assunzion direte di gnûf personâl, e scuên dut cês determinâ intal Plan trienâl de dibisugne dal personâl lis cuotis di trasferiments in cjame a ogni Ent che al aderis. Par ce che al tocje il recès o il disfasiment si rimande ai articui 7 e 8 di chest Statût.
4. Al personâl des Comunitâts si aplichin i contrats coletîfs di lavôr dal personâl dal Compart unic dal implei public regionâl e locâl.

Art. 24

(Diretôr gjenerâl)

1. La gjestion de Comunitât e je afidade al Diretôr gjenerâl, nomenât dal President de Comunitât daûr dai criteris fissâts dal regolament di organizazion dai uficis e dai servizi e dut cês intal rispiet di ce che al è previodût dal art.19 dal decret legjislatîf dai 30 di Març dal 2001, n. 165 e modificazions e integrazions seguitivis.
2. La Comunitât si zove di un Segretari, sielt dal President tra i Segretaris dai Comuns participants, che i vegnin assegnadis lis funzions di Diretôr gjenerâl.
3. Il Diretôr gjenerâl al è l'orghin di responsabilitât dirigenziâl che i spiete la ativitât di gjestion pe metode in vore dai indreçaments programaticis e dai obietîfs individuâts dai orghins di guvier de Comunitât. In particolâr:
 - a) al sorintint al davuelziment des funzions dai dirigjents e dai funzionaris cun podês dirigenziâi, coordinant la lôr ativitât;
 - b) al garantìs il bon funzionament dai uficis e dai servizi, introdusint struments e mecanisims operatîfs pal otigniment di nivei otimâi di eficiencie e eficacie;
 - c) al furnìs colaborazion e assistance juridiche amministrative ai orghins de Comunitât;
 - d) al esercite ogni altre funzion che i è atribuide dai regolaments o che i è conferide dal President dal ent.
4. Il President de Comunitât al pues procedi ae revoche de incarghe al Diretôr gjenerâl, dopo sintût il Comitât esecutîf, tal cês di mancjât otigniment dai obietîfs fissâts o di inosservance des diretivis, intal rispiet dal principi dal contradditori.
5. La incarghe dal Diretôr gjenerâl e à une durade di trê agns. La nomine e à une durade che e corispuint a chês dal mandât dal President de Comunitât che lu à nomenât. Il Diretôr Gjenerâl si dismet in maniere automatiche de incarghe cu la cessazion dal mandât dal President de Comunitât, continuant a esercitâ lis funzions fin ae nomine dal gnûf Diretôr.

CJAPITUL IV FINANCE E CONTABILITÂT

Art. 25

(Ativitât economice e finanziarie)

1. La Comunitât e à autonomie finanziarie intal ambit de normative regjonâl e statâl su la finance publiche locâl, fondade su la ciertece des risorsis propriis e trasferidis.
2. La ativitât economice finanziarie e je disciplinade daûr des normis in vore in materie di contabilitât.
3. Il regolament di contabilitât al discipline lis modalitâts organizativis pal davuelziment de ativitât economice e finanziarie.

Art. 26

(Rapuarts finanziariis cui Comuns partecipants)

1. La Comunitât e percepîs dai Comuns che le costituissin:
 - a) trasferiments ordenaris indreçâts a contribuî al finanziament des spesis di funzionament de Comunitât, atribuîts an par an ae stesse di ducj i Comuns e sometûts a rivalutazion. Daûr dal articul 3 di chest Statût, i criteris pe cuantificazion dai contribûts finanziariis in cjame a ogni Comun a son fissâts cuntun regolament;
 - b) trasferiments specifics indreçâts a finanziâ lis funzions conferidis dai Comuns;
 - c) trasferiments relatîfs aes funzions delegadis dai Comuns ae Comunitât, ogjet di convenzions specifichis.

Art. 27

(Orghin di revision economice e finanziarie)

1. La Assemblee de Comunitât, dopo vê verificât causis eventuâls di incompatibilitât, e nomene l'orghin di revision economice finanziarie, afidant la incarghe a un sôl revisôr e sielzintlu tra chei incargâts intun dai Comuns partecipants.

Art. 28

(Tesorarie)

1. Il servizi di tesorarie de Comunitât al è afidât cun procedure a evidence publiche, intal rispjet de normative in vore in materie.
2. I rapuarts cul tesorîr a son regolâts de leç, dal regolament di contabilitât e ancje di une convenzion specifiche.

Art. 29

(Control di gjestion)

1. Par garantî la realizazion dai obietîfs programâts, la gjestion corete e economiche des risorsis publichis, la imparzialitât e il bon andament de aministrazion publiche e la transparence de azion amministrative, la Comunitât e apliche il control di gjestion daûr des modalitâts fissadis de leç.

2. Lis formis e lis modalitâts dal control di gjestion a son disciplinadis dal regolament di contabilitât.

CJAPITUL V
ISTITÛTS DI PARTECIPAZION E DIRITS DAI CITADINS

Art. 30

(Partecipazion popolâr)

1. La Comunitât e sigure ai citadins e ai residents dai Comuns aderents la partecipazion ae formazion des sieltis politichis, ancje cu la indizion di referendums consultîfs, che lis lôr modalitâts di efetuazion, materiis e câs di esclusion, a son disciplinadis di un regolament di pueste.
2. La partecipazion popolâr si esprim midiant de valorizazion des formis associativis e di volontariât e cul dirit dai singui citadins a intervignî intai procediments aministratîfs che ju rivuardin. Lis formis di partecipazion popolâr, cjapadis dentri lis modalitâts di presentazion di istancis, petizions e propuestis, a son disciplinadis cuntun regolament.

Art. 31

(Dirit di informazion e di acès ai ats e partecipazion al procediment)

1. La Comunitât e conforme la sô ativitât al principi di transparence e e garantis l'acès ai documents e ai ats che e forme e che e conserve, furnint ducj i dâts relatîfs ae sô ativitât, intai câs consintûts de leç, par promovi la partecipazion dai interessâts ae ativitât aministrative e par favorî formis difondudis di control su la realizazion des funzions istituzionâls e sul ûs des risorsis publichis.
2. La Comunitât e discipline cuntun regolament lis proceduris di acès ai siei ats e documents aministratîfs che no sedin za acessibii daûr dal come 1.
3. Il regolament dal come al 2 discipline, cun di plui, la partecipazion dai interessâts intai procediments aministratîfs di competence de Comunitât, tal rispiet de normative in materie pai ents locâi e promovint l'acès informatic ae sô documentazion.

CJAPITUL VI

NORMIS FINÂLS E TRANSITORIIS

Art. 32

(Modificaziuns statutariis)

1. Lis modificaziuns a chest Statût si deliberin cu lis maiorancis previodudis par leç su propueste adotade dal Comitât esecutîf ae unanimitât e trasmetude ai Comuns, che si esprimin dentri di trente dîs cun deliberazion fate buine dai respetîfs conseis. La Assemblee e procêt dut cês ae aprovazion se, passât il tiermin dit parsore, si sedin esprimûts in maniere favorevule i doi tierçs dai conseis comunâi.

2. Lis modificaziuns statutariis a son deliberadis dome de Assemblee a maiorange assolude dai components cuant che a rivuardin adeguaments di recepiment sempliç di disposiziuns di leç.

Art. 33

(Gjestion documentâl)

1. I ats e i documents gjestionâi des funziuns e dai servizis conferîts ae Comunitât, a ben che riferîts ai Comuns, a son di competence dai orghins gjestionâi de Comunitât. Chescj ats e documents a son protocolâts e conservâts intal archivi de Comunitât, daûr des modalitâts di conservazion digjitâl.

Art. 34

(Disposiziuns transitoriis)

1. La Comunitât, fin ae metode in vore di regolaments organizatîfs e di funzionament dai siei orghins e in gjenerâl di dutis lis normis e prassis di organizazion si zove, stant che a son compatibii, dai regolaments e dai ats organizatîfs dal Comun plui popolôs, par chel che al è aplicabil.

2. Intai intarts dal compiment des proceduris pal afidament dal servizi di tesorarie de Comunitât, il stes al è afidât al tesorîr dal Comun plui popolôs.

3. Intai intarts de costituzion de Comunitât e dut cês fin al otigniment complet de operativitât amministrative de Comunitât, la funzion che e je ae letare "a" dal art.3 di chest Statût e reste in cjapitul ai singui Ents.

4. Intai intarts de aprovazion dal regolament pal funzionament de Assemblee, tal cês che nol sedi previodût in altre maniere di chest Statût, lis deliberaziuns a son adotadis in maniere valide cun maiorange assolude dai vôts dai presints e cuant che e je presinte la metât plui un dai vôts complessîfs.

5. Fin ae aprovazion dal regolament pal funzionament de Assemblee pal davuelziment des sentadis si aplicin lis normis regolamentârs dal Consei comunâl dal Comun plui popolôs.

Art. 35

(Rimant)

1. Par chel che nol è previodût in chest Statût si rimande ae normative statâl e regionâl previodude pai Comuns.